



Bentiaraq Ottosen
Atassut

UKA 2023/129
8.november 2023

**Qanoq iliorutta pisortat suliffeqarfiutaasa namminersortunut
unammillerunnaartissinnaanerlugit apeqquteqaat aallaavigalugu oqallisissiatut
siunnersuut.**

(Inatsisartuni ilaasortaq Aqqalu C. Jerimiassen, Atassut)

Siunissaq ornitarput isumaqarpunga ilusilersortussaagipput, pingaaruteqarluinnarpoq eqqartorneqartariaqartoq suliffissuarni ingerlatsiviit pillugit inatsisiliorneq aallaavigalugu aaqqissuuseqqittoqartariaqartoq. Eqqarsaatigineqarsinnaasoq tassaavoq nunatsinni suliffeqarfissuit namminersortunut unammillertussaanginnerat aallaaviusariaqartoq, soorlu oqaatigineqarsinnaasoq tassaavoq sanaartorerup iluani – illuliortarnernut inissialiortarnernullu tunngasut eqqarsaatigineqarsinnaalluarlutik. Uani pineqartoq tassaavoq pisortat inissialiortitserarnerat, pisortanut utaqqiinarnertut taaneqarsinnaammat.

Atassummiit pingaartumik unammilleqatigiinneq aallaaviussasoq siunertariuarparput, eqqarsartariaqarattami inuit pisinnaasut tamaasa namminersortutut suliffeqarfiuteqartut tassaammata sumiiffinni napatitsilluartuusut. Pisortaniilli ilannguffigineqarnermikkut inatsisit aallaavigalugit ajornartorsiulertartut takussaammata, tamanna isumaqarpunga pissusissamisulissasoq namminersortutut suliffeqarfiutilik nammineerluni ilusilersortussaammagu pisortat akuliuffiginngisaannagassagaannik.

Atassummiit ajornartorsiutit taakkartorneqartartut eqqarsaatigalugit suliffissuit ingerlatsiteqatigiiffiata inatsisaa allanngortinneqartariaqartoq isumaqarpugut, tassuunatigut namminersortut pisinnaatissagatsigit periarfissaqartilerlugit ullumikkutut ittumik allaanerusumik. Taamaatut ilusilersuilerutta pisortaniit utaqqiinanginneq aallaaviulissasoq isumaqaratta.

Oqareernitsituut siunissaq ornitarput ilusilersortariaqaripput Naalakkersuisut kaammattorpugut, pissutigalugu mittarfissuit maanna sanaartorneqartut naammassippata silaannakkut angallanneq eqaanerulertussaasoq ilisimalluaratsigu. Akikinnerpaamillu nunatta iluani silaannakkut timmisartuusineq anguneqarsinnaammat, taamaattumik Air Greenland tassuunatigut piareersimanera isumaqarpunga inissaminiittoq. Kisiannilu periarfissaqartitsisariaqarpugut aamma silaannakkut angallannermi namminersortutut ingerlatsisunik maani nunatsinni. Saniatigullu avataaniit timmisartortitseqatigiiffiit aamma tikilluaqqusariaqarpugut.

Pisortat suliffeqarfiutaasa namminersortunut unammillerunnaarsillugit inissinneq inuiaqatigiinnut peqqinnartumik sunniuteqartussaavoq, oqartarpugut assaat amerlanerusut sulilersikkumallugit. Taamatut iliorniaraanni pingaartuuvoq oqaatigineqartariaqartoq suliffeqarfiit namminersortut pisortat suliffeqarfiutaanut unammillernerat unitsinneqartariaqartoq. Eqqortuumammi kisermaassisussaataaneq nunatsinni annertuallaartoq, tamanna akimikkut nikingassuteqangaatsiarnerat takuneqarsinnaammat. Assersuut attaveqaatersuineq pillugu nunatsinni inissisimaneq. Sumiiffiit arlaqartut inoqarfiit avinngarusimasuniittut eqqarsaatigalugit attaveqaasersuutitut kingussaaqqanerat takuneqarsinnaavoq. Tamakkua eqqartorneqarsinnaalluartut isumaqarpunga.

Kalaallit Nunaani namminersortutut suliffeqarfiutillit amerlanerusariaqartut isumaqarpunga, inatsisiliornikkullu pitsaasumik aaqqissuuseqqikkutta kisermaassisussaataaneq annikinnerpaaffilersinnaagaluarparput. Taamaaliornikkut inatsisiliorniaraanni kaamattuineq annerusariaqartoq isumaqarpunga, ingammik una inatsit eqqarsaatigineqartillugu ilusilersuisariaqarpugut – aningaasat nunatta iluani kaaviaartinnerusariaqalerpagut, nioqqutissat assigisaallu akikinnerpaaffilerneqassappata sumiiffiit amerlanerusut pitsaasumik kinguneqartissinnaagaluarpagut.

Aallaavik allanngortinngikkutsigu periarfissat siunissamut ungasissumut pilersaarutaasut kiviartulissasut erseqqissaassutigissavara, pissutigalugu inatsisiliorneq ukiorpassuarni kisimi pisortanut tunngajuarmat – tupinnanngilarmi aappaluttukkormiunit annertuumik siuttoqartarsimanerput. Tusarnaarneqarsimanngitsutut inissisimasimavugut uagut Atassummiit taamaattumik tusarnaartut aammalu isiginnaartut isumaqarpunga eqqarsartariaqalersut nunatsinni talerperliunerusunit siulersorneqarnissaq pisariaqarluinnartoq. Periarfissat pitsaasut ammarneqartussaammata, inatsisiliornikkullu minnerpaaffiliisussaagatta pisortanut tunnganerusunik inatsisiliornikkut. Amerlanerujussuanngussagaluarput innuttaasunut inuiaqatigiinullu qaninnerusumik ammanerusumillu sullissinissatsinnut.

Taamatut oqaaseqarluta uani eqqartorneqartut inuiaqatigiinni tigulluarneqarnissaat kaammattutigaara. Qujanaq oqalliseqataagassi.